

Yom Kippur

Bo a pidi pa sali for di trabou tempran pa bo por yega banko promé ku e sera. Ma atábo awor, pará dilanti porta di banko será snòk snòk. Bo ta iritá. Olishi ta indiká ku banko mester ta habrí. Ta kon por ta ku ni un alma ta den bisendario di banko riba un dia di trabou normal. No ta un dia di selebrashon nashonal. No tin wèlga. Bo'n por saka bo sòm.

Porfin bo ta bin haña sa ku diferente negoshi i banko na nos islanan i rònt mundu ta será pa motibu di Yom Kippur. Ablif? Yom Kippur? Di baina bo por pronunsiá e palabranan straño. Bo ta kòrda ku bo a yega di tende di e dia aki. Ma kiku ta Yom Kippur? Bo ke sa pakiku algun negoshi ta será riba e dia aki.

Yom Kippur ta e dia mas sagrado di hudiunan, e konmemorashon mas importante. Debí ku nan tin nan mes kalènder, e no ta kai riba e mésun dia riba e kalènder ku nos konosé. Segun e kalènder hudiu, Yom Kippur ta kai riba e di dies dia di e promé luna sivíl, Tishri. Pa ta mas eksakto, e konmemorashon aki ta kuminsá ora solo ta baha riba e di nuebe dia i ta tèrminá riba e di dies dia na e mésun ora.

Riba e dia aki, hudiunan deboto ta pensa tokante nan pikánan, ta arepintí, i ta pidi Dios pa pordoná nan. E ta un dia di ayuno i adorashon. Ningun hudiu mester hasi trabou e dia ei. Nan ta bishitá nan snoa pa un sirbishi spesial.

E konmemorashon aki a originá miles di aña pasá ku Dios Su instrukshon den Skritura Santu na Su puebel, Israel, promé ku nan a yega na e tera ku Dios a primintí nan. Maske e seremonio aki ta antiguo, i maske e ta duná na hudiunan, tòg e konmemorashon aki tin un mensahe importante pa nos awendia.

Nòmber original di e konmemorashon tabata "Dia di Ekspiashon." Dios a duna instrukshon detayá pa ku un seremonio straño ku mester a tuma lugá na e tèmpel hudiu riba e dia aki. Levitiko 16 ta splika ku e sumosaserdote, pa haña pordon di su mes piká, mester mata un bisé machu, i sprèngu su sanger den e lugá santu di tèmpel. Anto el a tira lòt pa ku dos kabritu identiko. Un kabritu a ser matá komo un sakrifisio pa piká di e pueblo di Israel, i a sprèngu su sanger den tèmpel. Despues, ku su mannan riba kabes di e dos kabritu, e sumosaserdote a konfesá e pikánan di Israel, anto a mand'é den desierto komo e "kabritu di sakapatorio." Den e forma aki, Dios Su rabia kontra nan piká e ser pasifiká.

Pa nos e rito antiguo aki ta straño. Ma tin un proposito simbóliko tras di e seremonio aki, un proposito ku lamentabelmente hudiunan awendia no ta rekonosé. Segun di e buki di Hebreonan den Tèstament Nobo, e seremonio aki ta un pòrtrèt di loke Kristu a hasi algun mil aña despues.

Bo piká, mi piká ta un ofensa sumamente grandi den bista di Dios. E no por ignorá nos piká, òf E lo no ta hustu mas. Méskos ku e sumosaserdote a hiba sanger den e lugá santu pa pasifiká e rabia di Dios kontra piká, Kristu a presentá Su propio sanger na Su Tata, demonstrando ku El a paga e preis (morto) pa nos piká. E kabritu ku a ser di lòs den desierto kargando e pikánan di Israel tambe ta un pòrtrèt di Kristu kargando e piká di hende i muriendo na nan lugar.

E sakrifisionan di Dia di Ekspiashon a tuma lugá kada aña, demonstrando ku sanger di bestianan a proveé un purifikashon temporal so. En kontraste, Kristu Su morto tabata úniko. El a libra hende di e kulpa i kastigu di piká pa sèmper

Yom Kippur; dia ku hudiunan ta reflekshoná riba nan piká i kon nan por haña pordon serka Dios. Bo tambe ta ofendé Dios ku bo piká...diariamente. Maske mayoria di nos no ta hudiu, Yom Kippur por ta un bon oportunidat pa bo evaluá kon e ta pará pa ku Dios.

Kada pèrsona a hasi piká i ta meresé Dios Su rabia na fièrnu pa eternidat. Ma ningun hende ta haña pordon outomatikamente. Si bo ta atmití na Dios ku bo ta un pekadó, ta konfia Kristu SO, Esun ku a tuma bo kastigu, dramando Su sanger na bo lugá, i ta pidiE pa pordonábo, lo bo eksperensia Dios Su pordon. Yom Kippur--òf kualke dia--por ta BO Dia di Ekspiashon!" Bo ta sigur ku Dios a pordoná bo piká, ku bo piká ta ekspiá?